



Caderno da crítica

Cuestionario Proust: María N. Soutelo

[Ramón Nicolás 20 Xaneiro 2016](#)

1.– Principal trazo do seu carácter?

– A incerteza, a insatisfacción.

2.– Que calidade aprecia máis nas persoas?

– A súa cordialidade e sinxeleza.

3.– Que agarda das súas amizades?

– Que sexan calmadas, empáticas, sensibles, intelixentes e leais.

4.– A súa principal eiva?

– A indecisión, por veces.

5.– A súa ocupación favorita?

– Observar, observalo todo.

6.– O seu ideal de felicidade?

– Conseguir un equilibrio entre o que se espera de min e o que eu mesma espero de todo isto.

7.– Cal sería a súa maior desgraza?

– Conformarme.

8.– Que lle gustaría ser?

– Feliz.

9.– En que país desexaría vivir?

– Nun no que o exercicio da política fose puramente vocacional, e a docencia, a escritura e as artes, profesións notablemente respectadas e recoñecidas.

10.– A súa cor favorita?

– A cor amarela dos cadros de Van Gogh.

11. – A flor que máis lle gusta?

– O Iris Germanica.

12.– O paxaro que prefire?

– Aquel pequeno paporroibo que Tango e eu, no habitual paseo da tarde, rescatamos cunha á rota.

13.– A súa devoción na prosa?

– Non son unha devota demasiado fiel pero, se hei de nomear alguén, digo Proust, Murakami, Kawabata, Mishima, Woolf, Roy, Hui...

14.– E na poesía?

– Plath, Ribeiro, Pizarnik, Sexton, Torneiro, Knörr, Hughes, Lado, Penas,...

15.– Un libro?

– Só un?

16.– Un heroe de ficción?

– The Punisher, da Marvel.

17.– Unha heroína?

– Alicia, mil veces.

18.– A súa música favorita?

– A que me acompaña nas sesións de escritura, de lectura. A que me conmove.

19.– Na pintura?

– Andrey Remnev, Vilhelm Hammershoi, Frida Kahlo, os prerrafaelitas,...

20.– Un heroe ou heroína na vida real?

– *s que (se) sobreviven.

21.– O seu nome favorito?

– O da primeira muller.

22.– Que hábito alleo non soporta?

– O de non ser quen de limpar o que se enlixa.

23.– O que máis odia?

– A incapacidade (de moitos e moitas) de recoñecer e asumir os erros propios. A miña falta de fe.

24.– A figura histórica que máis despreza?

– Mal que ben e por moi detestable que resulte, toda figura histórica cumpriu unha función necesaria no seu momento, e para o conxunto da Historia.

25.– Un feito militar que admire?

– A batalla de Shiroyama, o 24 de Setembro de 1877.

26.– Que don natural lle gustaría ter?

– A omnisciencia.

27. – De que maneira lle gustaría morrer?

– “Sería bello / ir por las calles con un cuchillo verde / y dando gritos hasta morir de frío”, como di Neruda. Así.

28.– Cal é o seu estado de ánimo máis habitual?

– A emocionante montaña rusa da bipolaridade.

29.– Que defectos lle inspiran máis indulxencia?

– Aqueles derivados da dor da perda.

30.– Un lema na súa vida?

– “Non existe o Ter, senón o Ser, un só Ser esixente ata o último alento, ata o afogo” (F. Kafka).